

SARS E NKA MEHATO YA BOITSHIRELETSO KGAHLANO LE COVID-19 MAKALENG A YONA LE MAKENONG A NAHA

PRETORIA, Sontaha wa la 8 Tlhakubele 2020 – Ditshebeletso tsa Lekgetho tsa Afrika Borwa (SARS) di tsebisitse hore di nkile mehato e mmalwa ya boitshireletso ho arabela kotsi e ka bang teng ya tshwaetso ya Novel Coronavirus (COVID-19).

Khomeshenara Edward Kieswetter o boletse hore ditshebeletso tsa lekgetho tsa SARS le tsa bolaodi ba meedi di tla tswela pele jwalo ka tlwaelo makaleng ohle a SARS, diofising le makenong a naha. Mehato ena e tsamaisana le ho tshehetsa mekutu e meng e seng e nkilwe ke Lefapha la Bophelo bo Botle.

Makala ohle a SARS a tla fana ka dihlwekisi tsa matsoho ho balefalekgetho ba tla etela makala a rona. SARS e tla boela e netefatsa hore dibaka tsohle tseo ho sebeletswang ho tsona tseo hangata di thetswang ke matsoho di dula di hlwekisitswe ka disepa tse ikgethang. Balefalekgetho ba tla boela ba fumantshwa lesedi le mabapi le mehato ya motheo e ka nkuwang ho thibela ho ata ha COVID-19.

Hodima moo, Khomeshenara ya SARS e boletse hore, "Dibekeng tse fetileng, SARS e fane ka disebediswa tsa tshireletso ho diofisiri tsa yona tsa Bolaodi ba Meedi makenong ohle a naha, ho kenyeleditswe le dinkolenono, ditlafafo mmoho le dihlwekisi ho latela Ditataiso tsa Mmuso wa Naha".

Diofisiri tsa SARS tsa Bolaodi ba Meedi le tsona di tla tshehetswa ke diofisiri tsa tsa bophelo bo botle tse tlang ho lekola baeti ba kenang ka Afrika Borwa.

Diofisiri tsa SARS di bile di ikamahantse le Bolaodi ba Meedi ba dinaha tse mabapi ho arolelana lesedi le mabapi le ho qhoma ha COVID-19 mmoho le mehato ya ho fokotsa kotsi ya tshwaetso.

"Ke ipiletsa ho balefalekgetho le bahwebi bohle ho hlokomela lesedi lena le teng le ho nka mehato ho sireletsa maphelo a bona. Molaetsa o ka sehloohong ho basebetsi ba rona, mmoho le ho balefalekgetho, bahwebi le baeti ke hore ba se tshohe, empa ba mpe ba itlhokomele le ho nahanela ba bang.

"Ho shebana le sena, batho ba lokela ho ikamahanya le diketso tsa bophelo bo botle, haholoholo ka ho hlapa matsoho hantle le kgafetsa; le ho fokotsa ho dumedisana ka matsoho le maeto le ho dula ka matlong ebang ba na le matshwao a ntaramane."

"Re batla ho netefatsa balefalekgetho, bahwebi le baeti bohle hore SARS, mmoho le mafapha a mang a mmuso, e kgatha tema ya yona ho arabela taba ena ya vaerase ya COVID-19."

SARS e tla fana ka lesedi le leng ebang ho ka hlokahala.